

**ROSA ANA PRADA QUEIPO, SECRETARIA DO CONCELLO DE AMES NA  
PROVINCIA DA CORUÑA**

**CERTIFICO:** QUE O PLENO DESTE CONCELLO LEVOU A CABO SESIÓN EXTRAORDINARIA DE CONSTITUCIÓN DA CORPORACIÓN LOCAL O 13 DE XUÑO DE 2015. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE:

**ACTA DA SESIÓN EXTRAORDINARIA DE 13 DE XUÑO DE 2015 DE  
CONSTITUCIÓN DA CORPORACIÓN LOCAL RESULTANTE DAS ELECCIÓNS  
CELEBRADAS O 24 DE MAIO DE 2015.**

No salón de actos da Casa de Cultura de Bertamiráns, ás once horas e trinta minutos (11:30 h) do día 13 de xuño de 2015, ten lugar sesión constitutiva da nova corporación local, previa convocatoria do alcalde en funcións, **Santiago Vicente Amor Barreiro**, mediante decreto 884/2015, para darlle cumprimento ao que se dispón nos artigos 195 e 196 da Lei orgánica 5/1985, do 19 de xuño, do réxime electoral xeral (LOREX), e nos artigos 36 e 37 do Regulamento de organización, funcionamento e réxime xurídico das corporacións locais (ROF), aprobado polo Real decreto 2.568/1986 do 28 de novembro, referentes á constitución das corporación locais e elección de alcalde/esa.

Reuníronse, en sesión pública, os/as señores/as concelleiros/as electos/as nas eleccións locais celebradas o día 24 de maio de 2015, que son os/as seguintes:

<b>Candidatura do Partido Popular</b>	Santiago V. Amor Barreiro
	Alberto Piñeiro Rodríguez
	Mª Oliva Agra Costoya
	Ana Ruso Valiña
<b>Candidatura do PSdeG-PSOE</b>	José M. Miñones Conde
	Luisa Feijoo Montero
	José Blas García Piñeiro
	Mª Isabel González Cancela
<b>Candidatura de Iniciativa Cidadá- Ames Novo</b>	Mª Pilar Candocia Pita
	Mª Jesús Bóo Feijóo
	Xaime Subiela Pérez
	Roberto Amarelle Garabán
<b>Candidatura Contigo Pódese</b>	Genma Otero Uhía
	Catuxa García Mallo
	Silvia Dapena Liñares
<b>Candidatura Pacto por Ames</b>	Ramón García Argibay
	Mª Dolores Fernández Álvarez
	María González Gómez
<b>Candidatura BNG-Asembleas Abertas</b>	David Santomil Mosquera
	Mª Isabel Vaquero Quintela
<b>Candidatura Ciudadanos - Partido da Cidadanía</b>	Francisco J. López Suárez

Asísteos a secretaria da corporación, **Rosa Ana Prada Queipo**, quen fai constar que se cumpriron os requisitos que preceptúa o artigo 7 do Real decreto 2568/1986, de 28 de novembro (ROF) e o artigo 75 da Lei 7/1985, de 2 de abril (LRBRL) como trámites

necesarios neste acto.

Asiste tamén o señor interventor do Concello, **José Antonio Rueda de Valenzuela**.

**Punto primeiro.- Constitución da Mesa de Idade.**

Procedeuse á formación a Mesa de Idade, integrada pola concelleira electa de maior idade, **Mª Jesús Bóo Feijóo**, que pasa a presidila logo de prestar acatamento á Constitución mediante a fórmula de promesa, e pola de menor idade, **Ana Ruso Valiña**, que tamén presta acatamento á Constitución mediante a fórmula de xuramento. Actúa como secretaria da mesa a que é da propia Corporación.

**Punto segundo.- Xuramento ou promesa dos/as concelleiros/as.**

Constituída xa formalmente a Mesa de Idade, esta procede a comprobar as credenciais presentadas ou acreditacións da personalidade dos/as electos/as, baseándose na certificación recibida da Xunta Electoral de Zona de Santiago de Compostela. A continuación prestan xuramento ou promesa cada un dos/as señores/as concelleiros/as, segundo dispón o artigo 108 da LOREX, baixo a fórmula que establece o Real decreto 707/1979, do 5 de abril.

**Punto terceiro.- Declaración de constitución da corporación.**

Unha vez rematado o acto formal de acatamento da Constitución e comprobado que se cumpre a esixencia determinada polos artigos 195.4 da LOREX e 37.4 do ROF, a Mesa de Idade declara constituída a nova corporación local.

**Punto cuarto.- Elección do sistema de votación. Elección de alcalde/alcaldesa.**

Procédese a continuación á elección do/a alcalde/sa, na forma prevista nos artigos 40 do ROF e 196 da LOREX.

Son candidatos/as os/as concelleiros/as electos/as que encabezan as candidaturas que obtiveron representación electoral, Santiago Vicente Amor Barreiro, José M. Miñones Conde, Mª Pilar Candocia Pita, Genma Otero Uhía, Ramón García Argibay, David Santomil Mosquera e Francisco Javier López Suárez, polo Partido Popular, Partido Socialista, Iniciativa Cidadá - Ames Novo, Contigo Pódese, Pacto por Ames, Bloque Nacionalista Galego-Asembleas Abertas e Ciudadanos - Partido de la Ciudadanía, respectivamente.

Renuncian a ser candidatos/as á Alcaldía os/as seguintes candidatos/as: Mª Pilar Candocia Pita, Genma Otero Uhía e David Santomil Mosquera.

Antes da elección do alcalde/alcaldesa procede elixir o sistema votación. A presidenta da mesa de idade propón o sistema de votación nominal. Apróbase o dito sistema por maioría absoluta, cos votos en contra dos 4 concelleiros/as da candidatura do Partido Popular e o voto a favor do restos dos concelleiros/as.

Procédese á votación nominal para a elección do/a alcalde/sa, mediante chamamento a cada concelleiro/a. A votación ofrece como resultado que o candidato á Alcaldía **José Manuel Miñones Conde**, que encabeza a candidatura do Partido Socialista, obtén un total de 13 votos, o candidato á Alcaldía polo Partido Popular **Santiago Vicente Amor Barreiro** un total de 4 votos, o candidato á Alcaldía por Pacto X Ames **Ramón García Argibay** un total de 3 votos e o candidato á Alcaldía por Ciudadanos **Francisco Javier López Suárez**, un total de 1 voto.

A José M. Miñones Conde vótanlle os/as concelleiros/as seguintes: José M. Miñones Conde, Luisa Feijoo Montero, José Blas García Piñeiro, Mª Isabel González Cancela, Mª Pilar Candocia Pita, Mª Jesús Bóo Feijóo, Xaime Subiela Pérez, Roberto Amarelle Garaban, Genma Otero Uhía, Catuxa García Mallo, Silvia Dapena Liñares, David Santomil Mosquera e Mª Isabel Vaquero Quintela.

A Santiago V. Amor Barreiro vótanlle os/as concelleiros/as seguintes: Santiago V. Amor Barreiro, Alberto Piñeiro Rodríguez, Mª Oliva Agra Costoya e Ana Ruso Valiña.

A Ramón García Argibay vótanlle os/as concelleiros/as seguintes: Ramón García Argibay, Mª Dolores Fernández Álvarez e María González Gómez.

A Francisco Javier López Suárez vótanlle os/as concelleiros/as seguintes: Francisco

Javier López Suárez.

Á vista do resultado da votación e por obter a maioría absoluta do número legal dos membros que prevé a LOREX, a presidenta da Mesa de Idade proclama alcalde o candidato **José Manuel Miñones Conde**, do Partido Socialista.

**Punto quinto.- Xuramento ou promesa do alcalde/alcaldesa e toma de posesión.**

A seguir, o elixido como alcalde deste Concello, **José Manuel Miñones Conde**, que encabeza a candidatura do Partido Socialista, procede a cumprir a formalidade de acatamento á Constitución, segundo o previsto no Real decreto 707/1979, mediante a fórmula de promesa e pasa a ocupar a presidencia efectiva dende este mesmo momento. O bastón de mando depositado na Mesa de Idade, entrégallo o anterior alcalde, Santiago V. Amor Barreiro.

A secretaria infórmao de que está á súa disposición toda a documentación correspondente á acta de arqueo extraordinario da corporación asinada polo señor interventor e a señora tesoureira así como o informe sobre a situación do inventario municipal de bens.

**Punto sexto.- Intervención do alcalde saínte e do alcalde entrante.**

Tras a intervención do alcalde saínte, e antes da súa intervención como o alcalde, o señor Miñones Conde, concédelle a palabra a todos/as os/as que encabezaron as candidaturas que obtiveron representación municipal.

As intervencións que tiveron lugar son as seguintes:

Intervención de **Santiago V. Amor Barreiro**, en representación do Partido Popular: *Bos días aos novos membros da corporación municipal, e aos veciños e veciñas de Ames. Hoxe prodúcese unha alternancia no goberno de Ames. Como alcalde saínte sintome orgulloso de entregar un Concello, despois de 4 anos de goberno do partido popular, mellor de como o atopei. Cedo o testigo dun concello coas contas saneadas e respectado economicamente, a José Miñones Conde, novo alcalde de Ames. Sintome orgulloso do traballo realizado; traballamos arreo con toda a nosa enerxía durante estes 4 anos, con responsabilidade e honradez, poñendo o interese do Concello por riba de calquera outro.*

*Gustárame adicarlle unhas palabras a nova corporación e o seu novo alcalde ao cal felicito. O pasado 24 maio os veciños de Ames faláron, agora está nas mans de todos nós seguir escoitando os veciños, atendelos e tratar de alcanzar no día a día os mellores acordos para gobernar para todos. Lémbrolles e quero facer especial fincapé nisto, hai xa un alcalde de Ames pero aínda non hai un acordo de goberno e xa vai sendo hora. Espero que sinta vostede, señor alcalde, a responsabilidade que eu sentín, agardo que se siga falando coa xente, agardo que o seu despacho siga tendo as portas abertas como as tiña eu, agardo que representen vostedes a todos os veciños. Somos a forza máis votada, agardo que saiban ter isto en conta á hora de tomar acordos, polo ben de Ames.*

*Quero agradecer a colaboración de todos os traballadores municipais pola súa paciencia e a súa comprensión, grazas aos meus concelleiros polo seu traballo e adicación, todos contribuíron ao progreso de Ames; quero agradecer tamén á miña familia que estivo cando tomei posesión coma alcalde e que está hoxe cando deixo de ser alcalde, á miña nai, á miña muller e aos meus fillos sen os cales e sen a súa comprensión non podería haberme adicado de cheo a este concello.*

*Quero agradecer tamén o traballo dun piar fundamental deste concello, durante estes 4 anos, que son os servizos económicos e o seu interventor, Jose Antonio Rueda, sen os cales non se tería desenrolado o meu labor dun xeito doado e transparente, grazas*

á súa colaboración e a de todos os traballadores.

Gracias aos veciños pola súa paciencia, consideración e apoio durante estes anos.

*E permítanme, para rematar, unha mención especial a unha persoa que entraba no meu equipo no ano 2007 e que sigue neste equipo no ano 2015, que continua nunha nova etapa, esa persoa é Ana Ruso. Moitas grazas Ana".*

Intervención de **Francisco Javier López Suárez**, en representación do partido Ciudadanos - Partido da Cidadanía: *"Bos días a todos e a todas. Desde Ciudadanos Ames celebramos o inicio dunha nova lexislatura municipal no noso Concello.*

*E facémolo convencidos de que o cambio na política municipal empezou xa a ser unha realidade. Ciudadanos hoxe, aquí, forma parte dun proxecto máis aberto, máis participativo, onde a vontade de negociación e o diálogo non faltará neste período que hoxe comeza. En Ciudadanos Ames estamos moi satisfeitos cos resultados acadados o pasado mes de maio nas eleccións municipais.*

*Evidentemente, podían ser moitísimo mellores, pero reconfórmanos o feito de que veciños de a pé, conciudadanos de Ames, sen experiencia política, acadásemos un apoio significativo para hoxe poder formar parte deste novo goberno.*

*O ascenso de Ciudadanos Ames foi vertixinoso. En apenas un ano, logramos articular unha mínima estrutura para poder presentar un proxecto alternativo ao goberno de Ames, logrando un incremento de votos do 277% con respecto á última cita electoral, que foron as eleccións europeas. Temos pois, razóns, para saber que estamos no bo camiño.*

*Somos conscientes de que iniciamos un duro traballo pero estamos convencidos de que pouco a pouco, con tesón, con ilusión e moita vontade iremos afianzando o cambio que hoxe comeza.*

*Un cambio que non pode ter outro obxectivo que mellorar a calidade de vida dos nosos veciños e veciñas e incrementar o seu benestar. Estes fins foron precisamente os que pretendíamos co noso proxecto político referendado no noso programa.*

*Somos, como dicía, xente da rúa, profesionais, estudantes, xubilados, empresarios, asalariados, etc... que coñecemos a nosa realidade e a dos nosos veciños.*

*Somos xente que dou un paso ao fronte para defender un proxecto político baseado na responsabilidade, na dedicación e na transparencia.*

*Eses serán os piares fundamentais que guiarán a nosa acción en toda a lexislatura.*

*Desde Ciudadanos Ames pretendemos ser a voz no goberno dos veciños e veciñas do noso Concello. Queremos trasladar as súas demandas, as súas necesidades e atendelas con seriedade e honestidade; porque só desde esa postura de máximo respecto á súa vontade seremos quen de dignificar a función pública, tan deostada nos últimos tempos.*

*Estamos convencidos de que desde Ciudadanos Ames entendemos perfectamente a vontade de cambio dos nosos veciños e veciñas e só apoiaremos aquelas iniciativas de goberno que referenden, con responsabilidade, transparencia e diálogo a confianza que depositaron en nós.*

*Ciudadanos Ames exercerá unha oposición construtiva e positiva en todas aquelas iniciativas que, desde a sensatez, a eficacia, e a responsabilidade, melloren Ames e sitúen ao noso concello e aos nosos cidadáns no sitio que se merecen. Ese foi o compromiso que adquirimos o pasado 24 de maio. Moitas grazas".*

Intervención de **David Santomil Mosquera**, en representación do partido Bloque Nacionalista Galego - Asembleas Abertas: *"Bo día a todos e a todas, Ames ten futuro, e á vista está. Esta nova corporación é ademais dun perfil de idade novo que reflicte non só o cambio de paradigma na política, que xa é certo, senón tamén un relevo xeracional, iso a min persoalmente agrádame, hai cambio, hai renovación.*

*Tanto Isabel Vaquero coma eu, ao igual que o conxunto da xente que formou a*

candidatura do BNG de Ames, Asembleas Abertas e que participou na campaña estámosvos tremendamente agradecidos e agradecidas a todos os veciños e veciñas de Ames por darnos este apoio extraordinario, partindo dunha situación moi difícil. Despois de estar varios anos sen representación, conseguimos levantar a cabeza, facernos unha piña, encontrarnos de novo moita xente, e sacar este proxecto adiante. Finalmente logramos volver ter representación, volvemos a ofrecer diálogo e participación, tendendo a man para chegar a un acordo de mínimos que contempla ademais unha folla de ruta que terá que asumir o novo alcalde e lograr un goberno alternativo, un goberno de esquerdas. Eu non teño dúbidas de que o PSOE está situado na esquerda e aí están as súas políticas sociais para demostralo, entón eu, nese sentido, non teño a máis mínima dúbida.

Quixera ser breve, simplemente, comentar unha cuestión. Na política igual que noutros aspectos da vida, tamén no traballo, cando as cousas van ben aparecen amigos por todas as partes, sen embargo, cando as cousas se complican, se torcen e empezan a ir mal, só son os verdadeiros amigos os que están aí. Para nós fostes todos vos os verdadeiros amigos, a xente que participou na campaña, que nos deu o seu apoio, e que gracias a todos eles e a todos vós estamos aquí de novo, para falar con vos, para participar e para construír un concello novo. A partir de aí, a partir do luns, tenderemos de novo a man para construír este concello que tantos de nós desexamos. Moitas grazas e aquí estamos para sempre".

Intervención de **Ramón García Argibay**, en representación do partido Pacto x Ames: "Moi bos días, en primeiro lugar, felicitar o novo alcalde de Ames, José Miñones e ter un recordo para todas as persoas que nalgún momento determinado formaron parte desta corporación municipal e, en especial, ao noso querido profesor Alfonso Rey que formou parte da última corporación municipal.

Tamén me gustaría dar as gracias a dous compañeiros que estiveron nesta corporación ata fai moi pouquiño como son Emilio e Manolo, e a todas as persoas que mostraron o seu apoio ao único partido independente que hai no Concello de Ames, un partido que non ten ningún tipo de vinculación, nin a nivel nacional nin a nivel autonómico, que simplemente a súa política está encamiñada desde e para o Concello de Ames, e a todas as persoas que depositaron a súa confianza en nós.

Desde Pacto x Ames, como dicía, único partido independente, o noso único obxectivo é o Concello de Ames e, como non pode ser doutra maneira, vamos a intentar que o mandato das persoas que votaron en Ames, que foi pluralidade e integración e non foi exclusión, se leve adiante durante estes catro anos. Desde aquí mostrar a nosa máxima colaboración para o labor de goberno que vai ser complicado pero que á parte vai ser apaixonante porque demostrara se hai esa capacidade de diálogo que o Concello e as persoas que viven neste concello depositaron o pasado día 24 nas urnas. Polo tanto, creo que se abre unha nova etapa, unha etapa con expectativas interesantes, unha etapa onde o consenso e onde o acordo ten que ser a base do funcionamento deste Concello, unha etapa na que se vai a demostrar se esa capacidade de negociación, de xestión e de diálogo se vai reflectir na vida diaria. Simplemente agradecer a todas as persoas que dun xeito ou outro participaron neste proxecto e desde logo dende Pacto x Ames estamos á disposición de todo o mundo, como sempre estivemos. Moitas grazas".

Intervención de **Genma Otero Uhía**, en representación de Contigo Pódese: "Bos días a todos e a todas. En primeiro lugar, felicitar a José Miñones pola súa investidura como alcalde.

Quixera agradecer a todos os veciños e veciñas de Ames o apoio que mostraron para



*a agrupación veciñal Contigo Pódese. Contigo Pódese foi unha iniciativa cidadá nova que xurdiu do círculo Podemos en Ames, cun compromiso firme de recuperar o Concello para a xente, de acadar unha administración transparente, aberta e próxima á cidadanía, de garantir esa participación cidadá que non existe e de garantir un concello igualitario.*

*Temos un compromiso firme de dar resposta a situacións de emerxencia que están a padecer moitos dos nosos veciños e veciñas, de conseguir unha Administración eficaz; ese é o noso obxectivo e o noso compromiso. Somos tres mulleres as que representamos a Contigo Pódese na corporación municipal, a compañeira Catuxa, a compañeira Silvia e eu. Quero que se saiba que nós imos a ser a vosa voz no Concello, a vosa voz na corporación, esteamos na oposición ou esteamos no goberno, imos escoitarvos, por suposto, e imos dar resposta as vosas demandas, tédesnos sempre que queirades.*

*Gracias outra vez polo apoio, gracias a ese apoio se están a dar cambios no Concello de Ames. Nese cambio ábreanse novos escenarios, escenarios onde todos os movementos cidadáns toman protagonismo, como estades a ver. E que non vos enganen cando vos din que estes escenarios novos son perigosos e son ingobernables, non é certo, son escenarios novos que van obrigar a un consenso, que van a obrigar a que os responsables das corporacións municipais teñan que traballar arreo para chegar a consensos, teñan que facer propostas conxuntas, teñan que decidir de xeito mancomunado, en definitiva, teñan que buscar o ben común.*

*Eu vivo no Castro de Ortoño, preto da casa onde pasou a súa infancia Rosalía, e onde se fundou o Seminario de Estudos Galegos e me gustaría rematar cun fragmento dun poema de Rosalía.*

*"Hora tras hora, día tras día  
devolved a la flor su perfume  
despues de marchita;  
de las ondas que besan la playa;  
Y que una tras otra besándola expiran  
Recoged los rumores, las quejas  
Y en planchas de bronce grabad su armonia"*

*Busquemos ese consenso e harmonía xuntos. Gracias a todos por vir aquí".*

Intervención de **Pilar Candocia Pita**, en representación de Iniciativa Cidadá - Ames Novo: *"Bos días a todos e a todas, é un pracer estar aquí diante da veciñanza de Ames. Comezo a miña intervención felicitando o novo alcalde José Miñones que ten por diante unha difícil xestión pero eu estou segura de que todos estaremos á altura das circunstancias, porque será un goberno cooperativo, de esquerdas, o único que será posible se responde ao mandato da cidadanía. A cidadanía falou alto e claro, dixo que non quería que se volvea a gobernar con políticas de dereitas, con políticas de recortes, con portas pechadas aos cidadáns, a espaldas deles, xerando problemas que non existían.*

*A cidadanía hai catro anos mudou a un alcalde porque non lle gustaban as súas formas. Eu, naquel momento, díxenlle ao señor Amor que non se equivocara que non ganara el, que perdera Carlos Fernández, agora creo que pasou algo semellante, o que perderon foron unhas formas de goberno que a xente non quere. Ames ten unha cidadanía que ten a mente suficientemente clara, é maior de idade e sabe perfectamente o que quere para o futuro, e o que dixo que quería neste momento é que governe a esquerda e que governe consensuadamente, ese é o mandato que nos deu a todos e a todas.*

*Pola nosa parte, xa indicamos dende o comezo que para nós o ideal era un goberno*

*no que estivesen as catro forzas de esquerda. Se iso non podía ser, que estivesen tres e senón que estivesen dous, pero o ideal era que estivesen as catro porque iso é o que forza a tomar acordos de consenso e ademais dá estabilidade a un goberno, que tamén é moi importante. Nós nunca puxemos enriba da mesa nomes nin cargos, a única liña vermella que nos temos e que seguimos tendo é que sexa un goberno compartido, que non caia na tentación o novo alcalde en pensar que este é un goberno socialista e que eles son os que teñen o motor do cambio, o motor é un motor compartido, é un motor compartido a catro. Sempre as mans abertas para todo, pero tamén coa claridade, nós non entraremos nunca a formar parte dun goberno que non sexa un goberno único. Nunca participaremos dun goberno en que haxa catro gobernos nun, cun reparto de parcelas, que haxa un goberno do BNG, un goberno de Contigo Pódese, un goberno de Ames Novo e un goberno do partido socialista, catro microgobiernos; a nós ese escenario non nos vale e cremos que á cidadanía tampouco porque non foi ese o recado que mandou.*

*En canto aos agradecementos, quero ter un recordo con todos os compañeiros que abandonaron a corporación e non van estar agora, especialmente aos compañeiros Anxo Doval, Olalla Alvite e Susana Mayo, sen eles sería imposible que fôsemos capaces de facer o traballo que fixemos en momentos moi difíciles para todos a nivel persoal. Fomos quen de traballar cooperativamente para conseguir estar sempre aí coa cidadanía, levando propostas a un goberno que despois as gardaba nun caixón, pero iso, como sabedes, xa non é responsabilidade nosa.*

*Tamén quero ter unha mención especial a Xaime Subiela que vai a estar agora no goberno porque foi a alma mater de Ames Novo. Porque hoxe estamos aquí cunha proposta de marea cidadá, foi el o que nos fixo reflexionar sobre ela e chegar a ela, e non solo a nosa marea senón tamén ás mareas galegas. Foi unha das persoas que estivo aí no inicio para animarnos a todos e para facernos ver que iso era o que quería a xente. A xente o dixo alto e claro, no país e tamén en Ames. O 30 % das localidades queren que haxa marea, nós estamos seguros que vai a cambiar moito o escenario político de aquí en adiante e que vai haber marea. Gracias Xaime por ternos feito entender que iso era o que quería a cidadanía.*

*Quero tamén ter un recordo co compañeiro Alfonso Rey, de Pacto x Ames, que desgraciadamente a vida non lle permitiu que puidese compartir este acto con nós, e tamén co noso compañeiro Elviro Ramos que finou hai un pouco máis dun ano e que eu estou segura que desde algún sitio esta aquí vendo como sube a marea, para el tamén ese recordo esperanzado e querido.*

*A miña familia por aguantarme todo o que me ten aguantado nestes anos pero sobre todo por todo o apoio incondicional de Marcelo que foi moito mais alá do que pode esperarse dun compañeiro. Tamén aos meus fillos, sobre todo ao meu fillo, porque a miña filla xa é maior e non está nin aquí neste momento, sobre todo ao meu fillo xa que tivo que renunciar a moitas cousas e ademais fíxoo máis desde unha posición case de adulto cando só ten 13 anos.*

*A todos os cidadáns e cidadás deste concello por dar unha lección de dignidade, por dicir con claridade o que se quere. Nos vamos a estar aí facendo o que fixemos ata o de agora e temos unhas premisas claras, participación cidadá, transparencia e goberno para as persoas, goberno para que a xente non pase necesidade, esas son as primeiras cousas que ten que facer este goberno, o goberno que se xere a partir do luns. Espero que o partido socialista e o novo alcalde non caian na tentación de crer que eles gañaron as eleccións, que teñan a claridade de que quen as perdeu foi a dereita. Moitas grazas, adiante con este Ames que quere futuro!, Que suba a marea!."*

Intervención do alcalde, **José Manuel Miñones Conde**: "Señores e señoras, concelleiros da corporación, señora secretaria, señor interventor, representantes do tecido asociativo, educativo, comercial, cultural e deportivo, amigos e amigas, veciños e veciñas, grazas pola vosa asistencia.

En primeiro lugar, quero agradecer aos concelleiros e concelleiras que hoxe depositaron a súa confianza e voto na miña persoa para ser investido como alcalde do Concello de Ames. Grazas de antemán.

En segundo lugar, quero agradecer aos 14.081 veciños e veciñas de Ames que co seu voto decidiron escoller a aquela forza que sentían que lles podían representar e que deu como resultado, o pasado 24 de maio, que en Ames exista unha ampla representación de partidos.

Quero trasladar o meu agradecemento aos concelleiros e concelleiras que durante estes 4 últimos anos estiveron realizando un traballo e entrega na defensa dos intereses comúns. E quero ter un recordo especial para o profesor Alfonso Rey que xa non está con nos, tanto pola súa implicación coma pola súa amizade.

Gustárame deixar constancia neste discurso do meu recoñecemento a labor dos funcionarios e do persoal do concello, que soubo estar á altura das circunstancias e permitiu que co seu esforzo e dedicación este Concello seguira avanzando.

Quero dar a benvida ás 21 persoas que conforman esta nova corporación, creo que o reto que temos por diante é un dos máis difíciles e complicados dos últimos anos. Este mandato é o do diálogo é o do consenso porque así o quixo a cidadanía co seu voto, co mesmo voto que dixo que quería políticas de esquerdas e progresistas e iso vai ser o que fagamos desde o goberno de Ames. Un goberno no que non participará a dereita porque o rexeitamento das súas decisións quedou claro, pero aberto a acordos puntuais con todas as forzas. Un diálogo que xa amosa os seus primeiros resultados con este acordo de investidura, que permitiu asinar un documento de compromisos urxentes e amosou que existen numerosos puntos de encontro entre todas as forzas. É o momento de falar de liñas verdes, esa cor que tanto nos representa aos veciños e as veciñas de Ames. Estou completamente seguro que son máis as cousas que nos unen que aquelas que nos distancian, e por iso aproveito para emprazar a todas, reitero, a todas as forzas a traballar desde este punto de partida. Pasado mañá, luns, comenzarei xa a amosar este convencemento con feitos e chamarei a cada un e cada unha dos candidatos e candidatas para chegar a eses puntos de encontro cara ao futuro mais inmediato.

Durante estes case tres anos afirmei que Ames non podía xestionarse con só 4 concelleiros, non vou a mudar esta opinión agora por estar no goberno e reafirmome no dito, por coherencia e sentido común, por este motivo pídolles ás persoas que dende hoxe conforman a oposición axuda, axuda para sacar adiante todo o mellor para este concello. O meu compromiso é o de comezar a traballar o luns para formar un goberno maioritario e estable, un goberno no que as forzas que o compoñan actúen de maneira igualitaria, sen distinción de siglas ou de cores. Un goberno con un único obxectivo, o benestar dos veciños e das veciñas de Ames. Non vai ser fácil a tarefa encomendada. Ames dende este luns terá un novo goberno, que buscara levar adiante un proxecto destinado aos veciños.

A estabilidade deste goberno non vén só medida polo número de concelleiros ou concelleiras que o conforman, como xa o comprobamos en etapas anteriores, a estabilidade pasa polas gañas de traballar, polo compromiso e dedicación dos mesmos. Eu aposto decididamente por recuperar neste mandato o diálogo cos veciños e cos grupos políticos, ademais volcareime na tarefa de conseguir sacar adiante os acordos asinados xa para esta investidura e aqueles que veñan froito do diálogo cos grupos da oposición.

Probablemente a frase de que serei un alcalde que governe para todos e todas vos soe e a escoitariades xa en numerosas ocasións, pero aínda que soe a tópico crédemme que é unha convición e así pretendo que sexa este mandato. Represento



*dende xa ao Concello de Ames, a todos os veciños e veciñas de Ames, e fareino dende o respecto e a máxima transparencia, cunha axenda aberta, cun concello máis próximo e con tolerancia cero fronte á corrupción.*

*Finalmente quero agradecer aos compañeiros e compañeiras do partido e da candidatura o seu traballo, pero sobre todo a confianza depositada na miña persoa. Grazas de corazón.*

*Expreso tamén publicamente diante de todos vós o meu enorme agradecemento aos meus pais, que aquí me acompañan, á miña familia que sempre se preocupa por min, e dende logo, á miña muller e fillos pola enorme paciencia, sacrificio e apoio nesta causa na que son os máis directos afectados. Eternamente agradecido.*

*Espero de corazón non defraudar nesta nova encomenda e pídovos apoio vontade e paciencia para realizar este traballo e poder avanzar e xestionar este Concello como os amesáns merecen, para iso ídesme a permitir manifestar un compromiso con todos os cidadáns e cidadás do que quero que sexa a miña forma de facer política e que para iso faga miñas algunhas das palabras pronunciadas polo que foi alcalde socialista de París na toma de posesión de marzo de 2001. "Facer política é render contas, é transparencia, información e equidade. Transparencia na xestión municipal e solidariedade. É ter unha actuación exemplar a ton coa ética exixida polos cidadáns". Veciños e veciñas de Ames, dende hoxe a porta deste alcalde está aberta para todos. Grazas".*

Rematadas as intervencións, o señor alcalde convida os e as integrantes da nova corporación, a facer unha fotografía institucional para conmemorar o acto.

E non habendo máis asuntos que tratar, o señor presidente dá por rematada a sesión ás doce horas e trinta minutos (12:30), do día de referencia, todo o que eu, como secretaria, certifico.

Visto e prace

A secretaria

O alcalde